

五臺縣志

五臺縣志 卷之八

藝文志

碑記

傳

墓誌

詩

五臺縣志

卷八

目一



藝文志

五臺山川甲勝名賢代興其著述流傳抑以備史
乘之遺著鼓吹之盛也志藝文

碑記

重修南神廟碑記

宋進士
孫儼

邑之南十里有山層巒聳峙喬松茂翳上有古祠俗謂之南神塢蓋漢文帝祠也按史傳帝高祖中子破陳豨軍定代地立帝爲代王呂后臨朝諸呂專恣大臣平勃慮危劉氏以帝賢聖仁孝聞於天下乃迎以奉社稷帝謙遜退避恭儉節用夙夜憂勤罔敢逸豫至於惜十家之產而罷露臺悲緹縈以除肉刑勸農桑以捐田租憫老幼而賜粟帛仁

五臺縣志

卷八

二

施德布雖充溢宇宙而其潛德發躍蓋自代邑始代地民祀以祠宜矣然邑地石焦瘠薄旱則易乾水則易毀災則遽饑惰則失業今闔境之民家務和協人尙謙謹菑害不作豐稔屢臻豈非帝之孝道儉德芳烈未泯事有不便輒以利民猶常不忘於今耶不然何安康富壽之如此也鄉人具祭祀患不能有報虔者於是復新廟宇以祀之

楊公孝行叙

明大司馬
孫傳庭

公諱時倫字天叙號西泉五臺之百蘭里人先世

大同府朔州馬邑縣始祖有材徙五臺歷七代而生海海生公賦性冲和制行醇厚雖農畝布衣而一種純孝可風洵末季所罕覩者余與公長孫雅稱莫逆交故乞文於余以誌墓余敢實錄焉公因父疾禱於神願以身代持齋三載父疾果愈壽增一紀事母勤視問供甘旨享年八旬有四其教子也溽暑給饌大寒給薪歷久不厭是以夙無簪纓而子伯仲全年遊泮叨廩祿歷選舉孫枝亦皆翩翩者起方興未艾公將集全福於幽壤矣嗚乎終

身慕父母孝之大也一經訓子孫孝之永也異日玉樹聯芳金章寵賁光前而裕後者孰非公孝德所醞釀哉語云本固者枝必茂源深者派必長余於公信之不誣已是爲記

明陽觀碑記

金進士

元好問

臺州西南八里紫羅山之麓有保聚曰明陽臺駘祠浮圖寺在其傍舊有道院廢之久矣欲修復之而未暇全真師姬志元先住遼沁亦嘗留宿於此父老愛其道行清實有尸而祝之之義乃築環堵

而居之三四年徒從之者益多思所復立壇宇嚴
規制設興遊居寢飯之所斧斤埏埴率其人目親
之前後十五年爲殿者二曰三清曰通明爲堂者
四曰三官曰四聖曰秘籙曰靈官門檻齋厨以次
而其請於燕京長春宮得額曰明陽此觀事之大
凡也臺州長茹君以贊其事翊而成之甲辰春史
館從事李君昂適携姬之徒王志寬過余讀書山
爲予言曰今吾桑梓鍊師吾方外友也明陽又吾
杖履之所朝夕者也姬知吾辱與子遊欲得子之

文以記其經度子寧有意乎予不敢辭乃爲記之
顧盼檀施四方來集土木成金碧之富鐘鼓狀雲
山之氣蓋未丐以歲月記圭於黃老之教久徒知
有之求所以尊師重道如供佛然者則無有其人
也兵劫之後此風故在獨鍊師一出州之人翕然
歸之雖穉子輩亦爲起信而起敬古所謂存乎其
人乃今見之夫物蔽於物曲屈則有不能通者此
二家之所以更爲盛衰耶吾於此有感焉三綱五
常之在猶衣食之不可一日廢今十室之邑豈無

知人倫之數也者至於挾免園策援童子學者乃無一人焉寒不必衣饑不必食痛乎風俗之移人也嗚乎二家之盛衰又何足記耶姬高平人邱公嘗號爲崇道大師洞明子

重修廣濟寺碑記

明王源

縣治西鄰民居有古刹曰廣濟寺創造所自碑載甚悉夫何歲月浸遠棟撓瓦落墻圯臺頽一望荒涼難爲瞻仰矣前守是邑者因政煩事冗不遑是念宏治丁酉歲孟夏山左陽信光侯奉命來守是

邑侯自下車以來興廢舉墜百度俱新一旦政暇偕僚窳蓮幕臨是寺召諸僧謂之曰汝等咸賴佛教感人今如此坍塌無以爲人造福地何忍恣然置之耶僧普然宗善感其言慨然膺命於是邑之士民若尙義陳山以靜輩各捐金易材傾者正之朽者易之漏者葺之闕者補之金碧剝落者藻繪之牖壁漫漶者泥飾之輪焉奐焉一復其舊足以爲斯民造福居然一邑勝境而實由我光侯一命之力是績也不歸侯而誰歸耶予惟佛教之興始

自漢明帝時西僧達摩入我中國彷彿吾儒說性說心尤以生死輪迴善惡地獄果報爲言以故當時人心翕然崇尚迄今熾然雖釋教固非吾儒所宜言然就其所以爲教只是欲人爲善而已夫人性本善但爲私欲汨蔽乃爲不善耳向使世之人果因佛教咸化於善則性善可復美俗可成雍熙太和之世可致孰謂佛教不有益於人世乎哉自茲以往爲普然宗善者尙當晨暮鐘鼓晝夜香燈祝皇圖之有永祈聖壽於無疆豈徒被金縷袈裟

戴毘盧宗帽而已哉時因匆匆老衲拜請爲廣濟寺碑遂爲之記

均平水道碑記

明襄陽府推官

智幾先

五臺晉僻邑也滹沱爲帶環繞西南奔湧浩瀚地高而水下殊無補於灌溉北有泉巖河細流不及沱十分之一由郭家寨大興沛流於槐陰東冶等村洋洋浩浩頗大便利迺據上流鑿沙灘爲水地數日頻灌而膺朝廷重稅者坐視乾燥間有一溉則其借姻親也不則携雞酒而啗亡命豪雄也河

邊民徐光宇泣訴本道分數稍定楚人杜議日期
而里中豪橫益肆邑侯李公自陝右來守是邑胥
中涇渭分明有澄清蘆鹿之志量地之多寡分水
之日期自上而下週而復始仍遣牌以巡守防河
上之元咍刻印以封提禁晨昏之盜決彈壓豪橫
之心杜塞後來之口郭家寨地三頃水一日大興
地八頃水二日半槐陰地十七頃水三日半東冶
等村地三十二頃水六日一分派而三都稱便矣
偉哉偉哉昔西門豹治鄴十二渠邑人苦役豹曰

百歲後父老子孫思我當其苦勞費時沮者非一
不禁不撓渠竟就厥後漢長史以十二渠橋絕馳
道相近欲合二橋爲一橋父老不肯曰賢君之法
式不可改也豹借民之力興民之利民且永世不
緩矧公行所無事因民之所利而利之者乎若夫
善催征而鞭笞不用審均徭而頌聲交作招流亡
而集澤飛鴻撫邦屯而復邦啄鳥重根本則修學
校而設禹門雲路嚴保甲則繕城郭而建演武敵
樓葺社倉以預賑貸之所編保甲而申盜賊之禁

公皆行之而無難焉豈特分水一事哉予以爲分水一事非一時之利固貽萬世之澤者也於是敬爲之銘曰

華嶽之峯秀而魏黃河之水清而奇天以河山之秀氣流入李公心與脾去涇涉渭守臺邑沛乎德澤淵然思量地多寡分水期汪洋千頃誰及幾禹甸南山河洛思鄴守西門馬史紀祝公福壽多男兒臺人亦永有榮施

通濟橋碑記

明保定知縣
田龍

五臺縣志

卷八

八

縣南有地名孤嶼溝距縣十五里其各府州縣往來賓旅暨本縣士民商賈莫不率由斯路是喫緊咽喉最要關津也無如山勢嵯峨水機澎湃履其地者率皆以跋涉爲苦舊架木以濟第顛險不寧且木易朽蠹豈不拔之基哉關中念公李父母來蒞茲邑目擊此險卽勃然注念爰督義民劉道捐俸市材筮日鳩工從上徹下約三丈餘專用石條以甃之橫順布之以石左右衛之以欄不兩月而厥工告成遠邇騰歡猗歟休哉此正所謂一勞永

逸萬世利濟之澤耶昔人曰觀河洛而思禹功余亦曰過此橋者當亦思李公之功謹勒石以識不朽

射虎川碑記

巡撫
穆爾賽

皇帝御極二十有二載春二月西巡五臺爲

太皇太后祈景福也至德馨香正符丕洽畢事而旋由菩薩頂遵長城嶺西千乘萬騎雷鞞雲奔道旁林莽翦翦有虎伏其間駭而躍衆莫敢禦

皇帝親挽繁弱一發而殪之於時巡撫山西臣穆爾賽

五臺縣志

卷八

九

等奏曰是虎也爲居民行旅患久矣幸遇

天子車駕蒞止斃斯獸以安厥土應錫嘉名以垂永久

數懇至再

詔從所請名曰射虎川臣穆爾賽等敢拜手稽首而志

之曰猗歟休哉天道春生而秋殺君道德綏而刑威敷惠固以澤羣生除暴亦以安良善彼悖逆方命之徒猶虎也惟

皇帝以道德仁義爲弧以師武臣力爲矢十年之內滇黔隴蜀以迄閩粵海島蛇豕鯨鯢罔弗殄威用是

八荒晏如萬國貢賚黎首义安鳥獸咸若夫鏟民
虐以惠保元元湛恩汪濊靡有涯際豈直被兹一
方已乎昔唐太宗巡幸武德射斃猛虎_臣以爲美
談

皇帝體天立極揚大武而成至仁駿烈豐功炳耀千古
又奚唐太宗之足云

神武泉碑記

穆爾賽

康熙二十有二年春二月

皇帝西巡清涼山爲

五臺縣志

卷八

十

太皇太后祈景福也事畢由菩薩頂遵長城嶺而旋有虎
伏叢薄翳翳中駭而躍

皇帝親挽繁弱一發殪之蓋此虎爲患兹山久矣居民
行旅聞而懼忤咸謂宜錫嘉名永誌

皇澤巡撫山西副都御史_臣穆爾賽等以民情奏請陳
乞至再

詔乃許之方將修除荒蕪忽有清泉湧出林莽甘冽澄
泓經冬不竭猗歟休哉_臣爾賽等拜手稽首曰_臣
聞天之化育萬物也煦之以春日凜之以秋霜聖

人之治天下也興之以禮樂懲之以刑罰故天以至神之化運於上使庶類不測其端聖人以至詳之法曉於下使羣情知有所避彼貪墨橫暴之徒猶虎也聞之能無滋懼乎

皇帝道德仁義光被四表凡所舉動皆以惠保元元爲念用是字內义安人心吏治莫不鼓舞變易棄其舊而開其新唐虞夏商之盛且復見於今日故靈源紀異昭

湛恩汪濊於靡涯豈神爵醴泉所可同而語耶因書射

五臺縣志

卷八

十一

虎川於石謹誌之

射虎川碑記

邑舉人 閻 襄

臣 聞聖存要道錫類斯宏帝造熙風尊親爲大蓋王者覃化恃源以通而孝子爲心無微不盡温清允慰猶祝高厚而祀山川仁愛斯流實本至親以及民物恭惟

皇上

孝純於性

聖縱諸天

繼統守文更備開天之武

生知錫極猶勤學古之功承萬年有道之基創奕葉章
程於不朽剪累世難除之寇偕

祖宗智勇以同昭指西蜀之戈山屠封豕揮東閩之劍海
繫長鯨弓矢微張櫂愴北盡

廟謀遙授萌蘖南消載瞻帶礪之河山盡是清寧之天
地於是

賑荒發帑

賜酺蠲租四海云遙人無不遍三關伊近臣覩其詳始

五臺縣志

卷八

十一

年蠲租之半繼年蠲租之全沛春霖於寒谷時爲
皇上之恩時爲

聖母之賜覆解澤於荒郊讀漢帝賜賦之書歷今二千餘
年汗青再美邁姬祖行仁之政卜世八百餘載龜
灼猶遙於是膏浹九垓功垂八極

聖不自有原嘉誨於

慈偉業述由來播

徽稱於薄海凡六合昇平之慶皆

一人孝治之隆恭惟

太皇太后

淑惠篤生芳媿似任之盛

仁慈覃沛勳齊堯舜之隆聚

神聖於一家式倫常於萬國惟

太皇太后鞠育之愛卽覆載其奚殊惟

皇上孝養之誠雖舜文何多讓

寢門儀曲靡事弗周

宸陛歡承祇懷罔極乃卜

靈山之祀用求

五臺縣志

卷八

十三

嵩祝之徵

親幸五臺時維二月羽林萬騎繫馬山前扈從千官環

旌天際歷石蹬渡松溪入雲陂踰冰澗高巖朱羽

動拂牛斗於東西半嶺白雲橫變陰晴於上下林

開曲折華芝螻列而徘徊逕別低昂旗旒蜿蜒而

升降荒蘿蚓結怪石魑扶仰峭壁以千尋俯絕冥

而萬丈烟封谷口半出浮屠泉引林根斜通精舍

鐘聲暮動噌吰亂虎豹之號日色朝開閃爍渡虺

蛇之跡惟

孝思之不匱遂險隘之皆平爰致虔修爲敦誠告拂琉璃之蓮座祝箕翼於

椒闈歷五頂以偕登覽千巖而畢至

龍章丹篆輝煌日月之文

鳳字金書刻畫烟雲之壁履清涼之石而望九州風醇物阜敷天共樂清涼立錦繡之峯而瞻六合邇服遠柔輿甸錯成錦繡凡彼白鳥青獅之迹皆來蒼螭玉驥之踪豈意石橋流水之間亦有星旆雲旌之燦深山常寂寞何幸巖花野鳥齊歡邃谷久塵

五臺縣志

卷八

十四

埋更見遠岫遙岑煥彩茲皆

九重之大孝斯紫府觀

日角之光非同八駿之遠遊使崑崙接雲車之駕

祀事旣畢

天語言旋玉轡從容鸞鳳廻翔崖畔珠旗宛轉龍蛇上出松梢溪流警道以前驅岑巘鞠躬而下俯百靈獻瑞萬物觀

光祥雪迎鞭温風出谷凌空碧嶂昭回紛鬱之雲蔓艸青溪俯伏斑文之虎伊猛獸之率服聿

至德之咸孚

皇上於是弓挽烏號矢援肅慎一發而中兩洞其胸山
中

萬歲之聲雷轟崖裂馬上千軍之色汗浹魂驚軼才之
獸已除又何有於獫狁巨虛之膽皆破豈復慮夫
豺狼夜過新洲欲笑宋君之射醉歸芒碭還譏漢
祖之鋒彼小勇之爲誇豈

聖武之能測是惟我

皇上格天純孝勇出於仁振古奇功威生於義是以孚

五臺縣志

卷八

十五

誠攸屆天弧矢宿呈靈銘德惟遙后土山祇紀績

臣身居僻地目覩

光天堯舜以孝弟爲先乃親矚人間堯舜詩書載聖神
之勇洵足馨萬古詩書關雲耄稚蒸民皆從補助
而生懽覩誠求之

父母海隅剛柔風土不遺覆幬之內同歸仁孝於
庭闈南山齊日月之貞願

聖壽與臺峯並永東嶺望汪洋如見祝

皇圖偕海若俱長臣以臺人應紀

德恭疏

徽蹟永勒名山

五臺縣志

卷八

十六

與人感應之機果如見諸行事而諭以言語此事神之理既得而治民之道斯至理有固然信乎其不可爽也工竣特紀諸石以誌神之顯佑斯人並垂我梁公之德政於不朽焉時康熙六年歲在丁未五月之吉

重修文廟碑記

邑恩貢 楊鳴鶴

自天子之國以及省郡州縣凡有人民社稷之區罔不建立文廟虔修祀事焉蓋以尊道報德立萬世義理之極也其規模陳式創於興道重學之君

五臺縣志

卷八

十七

相而海內皆有一定之制脫見飄零毀缺相時修葺自有司之常事似無足異者然而治道之盛衰必觀於人心天理之際則上之君臣正九法明下之風俗美吏治清君子興行小人樂道此理之存於天地而不容一息之泯滅者故國家建官以司之擇士以養之講射行禮以教之總統其事於文廟何其重歟則其修治完葺非止備故事肅觀瞻也明矣康熙二十二年我臺邑文廟以地震毀邑侯周君始蒞茲土謁廟之日覩其摧折大懼斯文

之不振乃與教諭姬君各捐己俸鳩集百工而修理之邑舉人閻襄貢生曲爾昌贊理其事爲之募於鄉復擇士之謹厚者有陳之美閻之俊王元勳張涵等董其役一時殿廡厨庫門廊坊表煥然一新嗚呼當事者以官治爲旅舍也久矣視一切紀綱風化猶客之視主人事初不關於心無惑乎治不如古而士行之日偷也今我侯獨慨然以爲己任舉千古盛事自我輝煌此真知所先後者矣當其旣成也今

皇上御題文廟匾額適至卽揭於殿之中楹余嘗謂天下之治有聖天子以爲之倡有賢有司以竭其力其士不談先王之道民不率孝弟之行者未之有也雖更百年其效之及人猶且覩其事思其人起衰振墮相維於不廢况身逢其盛者乎爰爲之記

永貞諸石

重修文昌祠碑記

鄭斌選

粵稽帝君文昌之星上冠列宿下主風教蓋聯奎壁之輝而翊文章之運者也其訓誥文章所重在

乎陰隲所尚先乎忠孝故德則眷之以福而否則示之以譴其所以主持乎天理民彝者甚不誣也其廟初建於城外西北之峯山前令子和李公又移建於城內縣治之東然皆規模草創朴陋未備非所以妥神靈而壯觀瞻也邑侯梁公諱繼祖者遼東世胄康熙元年來令是邑撫凋殘則以惠代威懲奸宄則以猛濟寬催科不免也而撫字心勞流亡可招也而鴻雁安宅且救荒備糴下民無轉運之勞保境安民上差無催督之擾以至嚴大辟

則民命保全翔教化則盜賊屏息修城垣則保障足賴一時善政難以枚舉而要其指歸罔非托根陰隲原本忠孝者也癸卯入圍而後默念帝君爲斯文司命思所以崇奉之故於乙巳夏捐俸鳩工於殿前新增捲棚穹曲豐隆使帝廟黝然以深左右則有號房若跂若翼前建大樓偉肅壯觀猗歟盛矣向之草創未備者不且煥然改觀也哉廟後又建義學一所使諸生肄業於其中庶異日者人才輩出文藝進陰隲亦進科目隆忠孝益隆孰謂

我公譽髦斯士之德不又與敬共明神之典同一不朽也乎

修城碑記

邑進士 楊瓊枝

攷臺之城始築於元魏間明正統時邑侯張諱智展築週迴三里許蓋土垣也至萬歷三十三年巡撫魏公諱允貞者始以磚葺之下有石臺數層臺之上乃建垣焉峻岫崿峙高百餘丈西障峯龍下瞰虎水雖小而固晉地數千里雉堞之險莫險於此順治六年姜寇爲亂賊兵萬衆環城而攻之矢

落如雨砲飛若雷攻城之法百巧俱備守者倚堞而據一以當千相抗一年居民安堵古人所謂金爲城湯爲池惟臺足當之乃自大亂之後積久而圯磚敝石傾北面數百丈皆隨霖潦頽去東南亦各類其半大垣漸陷女牆盡缺向之所見巍巍崢嶸高峙於晉陽之北者竟使兒童上下儼然坦途矣臺之人亦久思重葺而工浩費繁僉謂非請於朝廷遣官發帑不能舉康熙元年我父師梁公下車撫字臺人如保赤子初年而招流亡勸開墾廣捐賑

緩催科以養臺之子民踰年而修學宮訓士子以興臺之文教踰年而講鄉約開義學以培臺之風化踰年而修衙舍葺廟刹以美臺之觀瞻踰年而建養濟院通橋梁立義塚以爲臺百年不朽之澤於是利無不舉害無不除而公因睹臺之城而有感焉曰及吾不修是仍臺之大利未舉而異日之爲害於臺人非渺小也謀諸臺人臺人駭其工而不敢應公曰此工今日不舉久之其圯愈多其費愈大吾豈爲吾計凡以慮他日之重煩我民也於

是捐資俸二百餘金集臺之官紳士庶願輸者得三百餘兩募於臺山各刹得一百四十餘兩公親董其事工取其堅費務其實自四月十五至九月十六日告竣層臺疊疊高壁倚雲較之昔日倍覺崔巍壯麗焉夫臺自兵燹之後不可問矣賴我公八年栽培童稚嘻嘻皆公之所滋息也綠野穰穰皆公之所灌溉也老者以息壯者以耕皆公之所培息也絃歌時聞訟獄不作皆公之所教訓也奸宄以消寇盜泯跡村落綿密戶誦詩書皆公之所

潛消而振作之者也而乃百政既興城垣載築百年不易舉之功公一朝舉之一民不擾而大工告成巍然煥然是真所謂召之棠也寇之柏也公之政之成也其惠我臺人者豈第一世再世之澤而已哉敢因工成而記

修城碑記

邑貢生

陳之美

濟物之謂仁成事之謂勇見於一身則恭敬博愛感之於外則視人之不得其所者如饑寒之切已身存乎志者復能引其責於我而不畏艱難古之

人當平居無事時其意量常如此及其筮仕而任民社之責也必子愛百姓重朝廷之事舉人情之所憚畏而不敢爲者一身倡之皆欣欣然樂從之豈恃夫敏幹之材哉其感召相喻之微有難以言盡者矣我周侯之牧茲土也值癸亥地震之後其始下車公署毀缺城垣傾裂樓櫓陴墻蕩無所遺三門壅塞行路梗澁於是賊盜宵聚百室懸磬公露棲旰食撫循慰止嚴更巷陌期月而人復安堵公曰茲邑之殘闕所待以整理者匪一城垣要事

也且擇其要者而圖之獨一人之力恐不能繼閭
邑士庶願勸其事者各量爾力其不願者吾不强
焉於是傳之一邑傳之四鄉皆曰我公爲我謀而
我拂我公大不祥也不謀而應者數百人鳩材命
工以築以甃役夫孔勤舊廢俱興嚴而高者爲城
邃而深者爲門女墻差立樓栱丹青百工告竣特
兩旬餘耳非惟不失昔時之觀且更增新輝矣吾
思夫人之創非常之事也或它用於數年前或待
夫恩信漸著而後勞於人未有蒞治未及期月而

驟興大役所需不艱人復踴躍爭奮而速成也所
以然者蓋以我公愛民之深出於至誠而人之應
我公也由於中心之所好而無勉強此其以仁者
之心成勇者之功而無所於難也邑人甚愛其勤
而樂其易不忍忘於心而願爲後世法請鐫諸石
以誌不朽

修衙宇碑記

閻 襄

凡膺民社之寄者能以家事治民事民無不得其
治矣則莫患乎視其居爲傳舍也苟有傳舍之心

則將視百姓亦爲傳舍而撫字之心必不勤視錢穀亦爲傳舍而催科之法必不善視斯人之農桑與禮義亦爲傳舍而其所生之成之道必不盡視天之災青民之疵癘亦爲傳舍而其所以事神勤民之政必不誠古之不以其居爲傳舍者惟白樂天凡所蒞任居之如家園圃臺榭必致其精如爲子孫長久計者然是故樂天所治之處則政聲宏張兆姓被福位至卿相竊嘗推之彼其意不屑屑於所居者必不屑屑於民矣宜其善政舉而流

澤普也故膺民社之寄者莫患乎視其居爲傳舍也我侯梁公蒞臺於斯五載其於治臺儼然若吾之家也民游惰則督之力田土佻達則課之修德災青上告來

天子之蠲恤催提屏跡免小民之追呼始葺城樓昭民衛也次建文昌宮興士學也復修城隍捍民災也視民之事皆切之如家中事而臺之官衙廢修葺者二十餘年傾頽敝壞觀瞻不莊曰前蒞此者何竟以爲傳舍也再不一葺久而益廢不其重累吾

民哉因庀材鳩工以飭之使其時工取其堅自
堂內外以至大門皆煥然而一新之雖瓦礫一木
一石無非捐貲構辦儼然治家中之亭閣屋宇場
圃戶牖也曷嘗以爲傳舍哉惟我侯不視之爲傳
舍是故撫字勤而民得其所矣催科善而臺之錢
糧得其理矣生成之道盡而臺之農桑禮樂教養
畢至矣事神勤民之政修而臺之中歲荒旱不爲
災設法賑恤老幼佩德近歲天亦順叙人各適欲
矣皆我侯以家事視民事故民無不得其治矣若

五臺縣志

卷八

二十五

朝廷選循良之吏舉卓異之臣登我侯於卿相之
位更以治家者治天下樂天白公遽能耑美於前
哉大工告竣襄因薰沐頓首謹記其歲月以銘我
侯之德政云

修虎河碑記

邑庠生

呂先聲

臺城負郭虎河帶其前河水西北來勢迅甚北門
去河計僅五十步舊緣城址有堤水順流東下轉
南蜿蜿而去近以秋潦漲溢漸齧城下癸亥歲復
值地震傾毀不一河水益近去城僅數武而北門

幾圮當是時邑侯周父師方蒞茲土覩城垣之頽墮憫閭閻之愁苦百方撫綏興廢補闕越明年政通人和案課多暇覽雉堞之威迴睇河水之縈泊而戚然有憂色曰此豈城之所恃以爲固者耶城砌碎石而水蝕其下雖細流尙不可禦若經秋洪波浩瀚則城不可爲矣乃捐俸買地䟽渠順其性而理之而臺之民亦且感公之恩懷公之德而樂與公以相成焉於是挾畚插負筭籠雲來星集工不匝旬忽雷雨一夕河北徙百餘步而臺之縉紳

士庶咸譱然稱頌以爲公忠愛之誠足以格天地感鬼神故民不勞而事竣工不費而告成奠斯城於磐石之安而與斯民保宅此土也非公之德孰足以與於此而公則謙抑遜退漠然不自有其功焉夫發泉幽谷猶著其名鑿池官署尙紀以頌况我侯德澤加於百姓精誠通於神明者乎迺爲之銘曰

臺城之北虓水迅奔秋波澎湃齧蝕崇墉我侯戾止惕然於心自甘藜藿慨出俸金爰作之障以防

巨浸風雷夜作怒濤馴行土堤石堰底定成平重
闡雉堞磐石永寧惟侯之德參合天人惟侯之行
動合鬼神屏藩孔固湍湐無驚千秋砥柱爲國之
楨永貞於珉用垂頌聲

蒼山大王廟碑記

邑人 張 燠

王嶽神耳降靈於周定時晉大夫家姓趙氏其先
世與王之生死出處載在史冊程嬰公孫杵臼因
以義顯可考而知者獨其生而爲英死而爲靈還
巖巖之氣佐鎮奠之功亭毒化育與造物者俱則

五臺縣志

卷八

二十七

其所爲天壤不朽者歟詩曰維嶽降神爲周之正
又不特頌美申與甫也夫周正一代之佐其澤及
後世福庇無窮者爲功且更不少夫功及一世者
報一世功及後世者報無際古人尸而祝之以酬
有德以祈歲時莫不有所見而况王之故鄉不遠
在孟之北靈濟實昭於漉之陽乎曩者旱魃爲虐
民心憚暑如愆如焚雍乾中谷五峯翠滅萬井紅
爐流金爍土焦禾殺稼元冥屏跡飛廉退休祠禱
無徵方社是吐王忽申精變異出其明爽訴於上

帝沛以江湖甘霖一洒渥潤百里起斃回生百穀
賴全活我婦子無憂子遺猗歟休哉功之及民固
如是哉時被澤者香火載道頌禱絡繹雲屯蜂擁
何啻萬數王乃示其巍德顯其驗享種種情狀變
化無方鄉之人莫不愛而敬之畏而服之思所以
妥侑神功者惟行宮之作一時歡呼樂從土木並
興錢米輻集不難而行宮成焉迎像而祝之迄今
春秋不絕蓋三十年餘於茲矣王國祥幼穉時爲
首事今且老矣欲紀當時事永於片石戎馬奔皇

間未及此也今磨拭已就用彰神功亦以當日受
恩之衆後世感仰之多且云有功及民則祀禦大
災捍大難則祀是則王靈旣妥而吾人亦不瀆也
已

重修明陽觀碑記

閻 襄

物之盛衰事之廢興時之得失情之憂喜皆其自
然者也非勉強之力也山髡而毛草茁而焦陵而
壑桑田而海潮廣居隆棟高堂邃閣冶容繡裳笙
歌雜作荆榛之野蔓草芊芊游神遠索彷彿當年

是耶非耶蕪田荒石斷垣廢井雉颺兔奔月寒風
冷千載非遙萬年一瞬樓榭翬飛塵集雲擁無耶
有耶是故據旄擁節輿高馬肥鳴鐘而食暑寒易
棲於斯喜矣茹藜藿被鶉裾宅北巢窟星轉霜披
於斯悲矣喜者狂悲者愍二者之中皆相對而不
知其將也是故智者矜其察勇者矜其武捷者矜
其搏健者矜其走哲人之所笑也哲人笑四者之
爲矜而又自笑其笑也是故春則溫夏則煊秋則
肅冬則寒四時之義也君子自適之心也雨爲霜

始雪爲風基凡物之義皆然而獨異於人乎累秩
積金雨風也丐夫空桑雪霜也夏思寒冬思暖天
不拂人之情而人惡之是惑也是故避死求生妄
也齊失等得幻也君子有道焉不違素不索隱衰
有盛理盛有衰情君子察之非一朝夕之故焉矣
是故有不朽者金玉非珠貝非樓閣阡陌非文章
非事業亦非非金玉珠貝樓閣阡陌文章事業而
爲不朽者所以盛衰乎物而不與物爲盛衰者也
臺邑西八里有觀上村村以觀名是觀先而村後

也不知歷幾年村存而觀去矣察其舊址洪濶宜
爲臺邑盛境祇餘舊殿一在蓬棘中石留元跡其
卽始於是耶不始於是耶始於是者必自無觀而
有觀無觀之時與今日同不始於是者必自有觀
而無觀有觀之時又與元同盛衰興廢之理如此
其足動憂喜於中也耶道人段無量善人任澤廣
岳永正畢元輔等康熙壬戌歲助而修之葺其殿
添設兩廊與曩時煌然別一景象工竣求襄記其
歲月襄因段道人諸善人皆有慕乎道而爲此觀

者因明盛衰自然之數而使貞於石

追序邑侯吳公守城碑記

閻 襄

順治五年己丑大同鎮姜瓖叛晉陽以北五十餘
城半爲賊所攻據方是時臺人四鄉亦多迫以叛
者轉而攻臺旌旗蔽天蜂擁蟻聚攻圍之法百出
其奇城中危悚待命旦夕吳公曰吾朝廷官也城
破吾不敢自愛而城中男女數百生靈將齏粉矣
遂會同原任朱公諱國俊張公諱贊學師章公諱
時雨典史孫公諱煥巡檢王公諱育德並閤城紳

衿百姓歃血城頭立誓死守各罄已貲犒城卒晝
夜持戈親當矢石相機出戰家人忠死者吳虎吳
有功此六年冬事至七年春姜寇破餘黨悉遁於
臺臺圍愈急大兵又方有事於南臺之受圍期年
不解寇益出奇計爲雲梯爲地洞城欲破者數次
公益出死力以據之士民感公之忠益無不願效
死者時臺之四鄉焚毀已盡孤城竟賴以全南甕
城小室公守城時坐臥處也迄今二十餘年過其
室者莫不撫膺流涕乃鐫石爲之歌曰瞻彼西山

滿目旌旗惟茲彈丸匪公誰依我來至此風雨淒
淒

副總兵湯公鎮撫碑記

張 燠

勤在王室謂之功恩加百姓謂之仁夫忠君者必
愛民民爲邦本誠重之矣國家選撫道擇牧令居
常教養使無失家人婦子之欲安而息之則已矣
萬一事出意外勢變衆興不得已而命將出師固
曰剪除截滅求必如馮異曹彬乃所願也鄉者雲
中假義臺境效尤蟻聚蜂屯幾及一載先是把總

胡公守禦於此戢兵最嚴鄉里無擾民皆感之未幾調去而湯公適來鐵馬怒馳旌旗輝耀而紀律如常步伍不雜井井然也移駐竇鎮卽申戒令示居民約軍政而勇士懼出寬告而流民安兩月之餘油然見千村烟火四路遊人綠野青畦荷鋤而執鎛夫散亂之餘人懼其罪家互其惡逃亡流徙之不足一旦視農業而務本事自非仁心善政哀劬勞而集驚鴻未能如此且竇鎮雖一鄉之彙集實四縣之通營貿易所在四民資養國稅所出者

兵焚來瓦礫盈街蓬蒿夾壁子遺株守待斃又安望其女餘布而農餘粟湯君振動補壞起廢推心置腹一爲閑奸邪偵伺之防復通工流轉之度以軍餉易糴軍無不價之取以民貨爲變換民無藏伏之奸兩利之道興四方之營彙則見小大徃來有無不窘飲食衍衍無舊異也念民間止有秋禾親騎以巡放刈恐新招不安乃心家至以勸改格使宿罪者不危而安憂家者不憂而穫又豈特保正不擾婦子無驚哉每言爲朝廷官當治朝廷事

居百姓上毋示百姓威善之善矣加以崇儒重道
禮士下賢交接春風和氣決溢倘所謂古良將儒
將非耶四方之民感之不已求所以不朽其功若
德者恐載道之口不足以盡之勒之堅珉以示後
人是爲記焉

大覺寺十方院記

邑廩生 閻立

韓子曰墨名而儒行吾與焉臺邑諸寺凡可遊觀
者不下數十而吾於大覺寺獨有所取寺創於明
爲僧性資與其徒靜菴和尚者所建在城北門外

五臺縣志

卷八

三十三

面臨虜水

國初以來河水漸齧其基兵火之後廊廡俱爲灰燼
而存者惟三教殿焉順治戊戌余從叔大人與縉
紳姚公各出資以倡施者靜菴之孫名照清者始
移於城南里許溝南村之西焉寺據邑衝要凡官
吏公役之外技藝之士商賈販易之流往來於晉
省汾潞者莫不由此而川湖河陝之遊五臺山者
大率息肩駐轡於是乃設十方院行旅者甚便也
然而數椽之宇不足以安四方之衆僧復募於秦

蜀江閩垂三十年始克增擴其制度崇廣其堂宇殿三重曰天王曰文殊新建者也曰三教仍昔者也傍曰水陸殿關帝伽藍祠內則有禪堂方丈齋厨外則鐘鼓樓官亭茶房昔所無者增之有者新之翼然煥然足令聞者慕見者喜其迴廊閒館足以休息困乏爲旅人賴其僧之奔走風雨經營勞悴也不必悉言吾於僧之啓三教殿而知其有善意也彼以爲釋老之教清淨無爲而途則狹獨儒者以帝王君相之學以治天下則天下之士農工商

商皆在儒者之道中是故合而尊師之凡東西朔南之人非儒則道非道則僧遇其人無參商登其堂者不驚異廬其廬食其食不以爲可恠也其事之合與不合固未可知而其意則可嘉矣嗚呼先王之世天下之民四而天下之道一人皆服其業安其生其奔走於道路者兩國之信使則設亭館以處之而給之以薪芻膏膳商居以厪工處以市士之出遊者有士以爲之主農皆老死而不遷迨佛法盛行崇釋氏者廣爲之收集而大慈之風愈

溥矣僧今置此院於通衢不問貴賤不問智愚莫不憇者憇息者息饑者食渴者飲風雨霜雪得其庀衣裳行李無所虞彼將使天下之人盡入我門戶非徒能修浮屠氏法又可以備治典之所未及矣是亦邑之不可少者也僧亦於接待之暇考擊鐘鼓頓禮聖賢參禪旨悟性命以求一身之歸宿亦如道路之人於塵中而得其歸止也故名其寺曰大覺將以自覺者覺十方之未覺者歟假令起昌黎於今日必喜其意而嘉其行也而余於茲寺

五臺縣志

卷八

三十五

亦是之取爾

重修西門外闔縣風水土橋記

張暄

風水橋者西關外圈馬溝之土橋也非城垣之所依四境之所通也又非名區勝地可以具玩賞而壯觀瞻也夫然毋寧不修可也而乃有不可不修且不容以緩其修者則以是橋之建形家言爲一邑之接龍過峽也蓋自西山蜿蜒而來至峯山而結穴而開障邑城實坐巽地一河灣環映帶左右地靈人傑實由於此

國初山水橫決穿蝕城溝山脉來自西峯者遂以中絕歷三十年不登一鄉榜且遭兵燹歲丙子前令方太翁精於地理諭臺人從斷溝補築土橋以通縣脉不數月而工成是秋八月卽達殷孝廉嗣是累科決勝或同袍二三人以及五六人聯鑣接踵而土著生資亦盡復舊焉八九年來土橋復中斷數科無登榜者癸卯鄉試邑之紳士集會城同聲合辭以修築此橋爲務茲當秋成又值賢父師整飭振動之於是鑿鼓不煩而橋再成也謹序

五臺縣志

卷八

三十六

重修風水石橋碑記

王秉韜

五行生剋制化之道天地四時萬物俱不得而外之雖形家者爲一家言本屬小道而其言徃徃多中五臺西關外相傳有風水石橋縣志缺焉後之爲隨時補苴計者祇修土橋十餘年輒圯今并土橋遺跡亦不得而見之矣乾隆丙申九月韜承乏茲土簿書之暇擬續修縣志徵求前人著述見張孝廉暄於雍正初年有續修風水土橋記備言橋爲全邑之接龍過峽乃一邑士民所關係重修之

舉是不可緩爰擇董事數人捐貲倡始丁酉春融
開山取石庀材鳩工深去淤泉厚築根底工興於
三月十九日竣於六月十三日寬長高厚若干具
載碑左落成之日偕學博平公暨監工紳耆輩周
視色喜咸請勒石垂久遂書以爲記

傳

烈女劉壽貞傳

明僉事
章懋

五臺劉氏諱壽貞光州先生之女天性剛直先生諱復初蚤年舉鄉進士第正光州學壽貞漸於庭訓識字嘗讀古今列女傳籍諸書稍長許字邑人盧春未娶永樂初年建都北京天下趨事者如市春遂以疾卒於工時壽貞青年二九櫬歸泣曰禮烈女不事二夫妾雖未及舉案卽其妻也誓不適人語畢氣絕良久復甦變服披髮犇號櫬前淚盡

五臺縣志

卷八

一

繼以血葬如禮遂往其家事翁姑甚孝其家至乏別無弟姪可代養者始終未嘗怨言逮終無以傭工躬自負土以葬之見者盡爲流涕兀坐一室戶外未有一履跡朝夕惟女事是事雖親戚子弟不得見也節婦貞女之操如此有司以其事聞於朝廷表其門閭月給以食歲給以衣年七旬有四疾終於家時宣德庚辰歲也

贊曰女子之失所天不再從人者間有之多棲身母家求其善事翁姑者百不一二噫嘻處變之難

能也誓於一時者易處於悠久者難悠久固難而
孝事翁姑尤難也矧其家至乏而未與夫婿接者
歟節義孝行如劉氏者越宇宙而不多見其人焉
嗚呼冰霜未足語其潔金石未足語其堅清風萬
古懦志貪廉其光州之家訓歟噫節矣

烈女曲秋葉傳

明巡按
康

曲烈女者山西大同之靈邱人也幼名秋葉父大
保母馬氏一弟曲价子家貧甚居代州碾玉村烈
女生而頑哲性娟靜鄰居見者靡不嘆貧家安得

是美媛多求姻其父母以子女鮮少不欲遽適人
故久未卜萬歷十七年女十七矣弟亦十有四歲
大禋其父母携出就食五臺境問舍生員安崇德
家時崇德止房三區耳見女容止異亟許之北則
崇德母居而束舍三楹卽烈女與父母僦居處也
初入烈女見同院意甚不樂欲析父以初至俟再
卜時歉甚大保懼閤室之無以自存也因受村中
牛代爲牧本年五月十五日大保驅牛出恐踐人
田約妻携子同送之時在家者獨烈女耳崇德瞰

其獨處因從門外揚言欲以挑女云處女身大如許耶大是奇事比女已房聞之矣然以閨秀難與言姑忍以語母乃崇德已入復出曰女佯不知耶世間安有如此身而謂女者因擲梨房內女遂大哭不可禁而馬氏回適見地遺一紅封發之則梨也女謂拾此穢物何事姑留原所以待父歸耳因哽咽不能語曰此地吾不願居而父母強留不肯去今若不速移後將以醜終矣因具道云云馬氏疑不悅反怪謂誰爲女築室待耶時崇德母武氏

知女必告母恐具訴亦在旁伺勸云女母言良是女今未適人可遽效此長舌耶女雖收淚而憤憤已不堪矣越十九日大保三人送畜復出崇德見伊父母前之無言也復用言再試之女正色拒以不可崇德遂詈汝癡物既不諧人意留汝何益乎且昨愬若母若能如我何外人聞之祇恐河水不能滌也女益哭益憤馬氏回至儀門外微聞此語入見女哭問主人詈者誰女哭曰母既不吾信矣今復向誰問耶於是馬氏亦哭而武氏復來勸諭

女見父母之執迷不去決不欲生矣乃宛轉給其母曰父明日尚無糧可往貸之他所馬氏不悟誤信之甫出門則女已闔門縊矣時遠近靡不哀嘆而大保夫婦亦遂訟之官姑置崇德於法二十九年巡按趙公文炳具題命旌表又三年恤刑某子甲尚欲爲崇德求出余是歲亦來巡晉乃執法按之間嘗一過五臺聞女葬所則地名龍泉村距城四里許三尺微封逼鄰溝堰將侵蝕不可識矣因行通判蒲嘉輪爲買民地五十畝起葬其中中墓

一坵圍九丈高三丈東房六西房三磚券門一墻內植松栢四行爲株八十四外植二十一若共貞女風焉院內方圓一畝二分餘地四十八畝卽給看塚人以資日用而又除去租糧無使再稅復擇人爲守其墳時烈女之父母俱亡矣獨遺弟曲价子流落不獲最復後得之靈邱縣尹方來隨令與守塚人孫應科陳海同居墳內嗚呼烈女一貧女耳生僅十七非有禮義之訓出閥閱之門也乃其秉性剛方義不受辱竟烈烈以死自非天植之堅

貞烏能捐生若是哉觀對母垂涕之言與扃戶投
縊之狀至今人無不興而弔之者則慷慨從容烈
女蓋兼之矣嗚呼蘭以馨致焚玉以瑩致碎卽焚
與碎無足爲蘭玉損也顧其如奇珍之不可常存
於世何哉烈女生於靈而不得其死於茲土造物
固默有以定之矣余悲夫貞潔異淑恐與卉同湮
也因爲作曲烈女傳

墓志

聶孝女墓志銘

元好問

五臺聶天驥元吉爲尚書左右司員外郎壬辰之冬車駕東狩元吉留汴梁明年正月二十有三日崔立舉兵反殺二相省中元吉被兵創甚女日夜悲泣謁醫者療之百方至刲其股雜他肉以進而元吉竟不可捄時京城圍久食且盡閭巷間有嫁妻以易一飽者重以喋血之變剽奪陵暴無復人紀女資孝弟讀書知義理思以大義自完葬其父

之明日乃絕脰而死士大夫賢之有爲泣下者女字舜英年二十二嘗嫁爲進士張伯豪妻伯豪死歸父母家嗚呼壬辰之亂極矣中國之大百年之久其亡也死而可書者權參知政事翰林學士承旨子政右丞大用御史大夫仲寧戶部尚書仲平大理德輝檢點阿撒郎中道遠省講議仁鄉奉御忼哥宰相子伯祥宿直將軍長樂妻明秀參知政事伯陽之夫人與孝女十數人而已且有婦人焉夫一脉存不可謂之絕一目張不可謂之亂一人

立志不可謂之士崩痛乎風俗之移人也孝女合
葬張氏墓在某所銘曰嫫政之姊哭徇其季千祀
有傳猶聶之世嗟惟孝女之死自遂死而有知及
父於隊以子則孝以婦則義以斷則勇以守則智
於今之人麟鳳之瑞莫革者名天曰美器不於士
夫一女之畀銘以表之并志予愧

詩 五言古

夜聽許十一誦詩愛而有作

唐左拾遺內供奉
杜甫

許生五臺賓業白出石壁余亦師粲可身猶縛禪
寂何階子方便謬引爲匹敵離索晚相逢包蒙欣
有擊誦詩渾遊衍四坐皆辟易應手采捶鉤清心
聽鳴鏑精微穿溟滓飛動催霹靂陶謝不枝梧風
騷共推激紫燕自超詣翠駁誰剪剔君意人不知
人間夜寥閭

五臺縣志

卷八

一

東軒示兒子沂

宋五臺簿
姚孝錫

古人無復見但見東軒琴一鼓高山操因窺古人
心正聲久沉埋俚耳喧哇淫正可自怡悅不須求
賞音

登清涼石

明進士
鄭材

勞勞遊宦子坐此清涼石頓似超苦海剎那化國
適曇雲萬壑生寶山四面闢繫此五臺奇浩劫誰
劃擊

登清涼石

明進士
邢雲路

四圍山面面九步石方方石方方何清涼廣容千
萬衆傳者疑荒唐觸蠻蝸國戰大地黍珠藏睠此
九步石行者宜徜徉茲石能令來者行茲石能令
行者悅茲石自清涼人心自炎熱

題冰雪堂

明方伯

王道行

卓彼劉節女良人未娶亡孀居五十載足不履門
墻心志堅金石冰雪揭華堂賢名書太史奕世垂
休光清冰和白雪可擬劉氏操雪消冰亦解女志
獨堅牢泣血踰三年時日良悲號克養翁姑孝塚

五臺縣志

卷八

二

邱躬自抱令名耿不寐猶憶儀兩髦以之諭冰雪
榮之華袞褒婺山同屹屹婺水同滔滔陳詩附史
編千載咏清高澄澄玉壺冰皎皎瑶天雪不濁任
爾撓不淄任爾涅雪白母之心冰清母之節一矢
從匪他萬矢何絕決冰玉自輝映閨門自英烈嗟
彼怕寒者誰能望高潔嚴冬寒沍時衆芳盡凋歇
不有堅貞操誰與傲冰雪春風冰易解朝陽雪還
竭嗟嗟烈女心始終同一節久持冰雪操人視竟
難堪潔白渾如一嚴凝已並三孤寒咸莫受苦節

獨能甘列傳稱賢母千載播斗南

冰雪堂

四言

明邑令

張智

南山有冰惟冰之清冰其清矣劉氏之貞南山有雪惟雪之白雪其白矣劉氏之潔

湧泉寺八詠之四

明兵部尙書

孫傳庭

踈鐘撞月

踈鐘古刹傳明月空山盪深聽自相捫如從月得響素影不可扣清籟竟安往如何林莽間一一皆鳴爽

五臺縣志

卷八

三

象塢雲深

誰將大士座置向山之阿因以象名塢猛氣狎烟蘿塢上經掛衲無雨雲自多我來探靈跡或恐是龍窩

寒松蔓漢

鬱彼千歲松偃蓋寒光映奇聳龍鶴形冷具霜雪性長風拂漢來謾謾動清聽鏗聲散寥廓寥廓如相應

松落烟蘿

深徑蘿冉冉彌望烟漠漠遙聞鷄犬聲知有人居
錯老幼總無營第不廢耕作辟地余有心此中良
不惡

扈從清涼山

用謝靈運登池上樓韻

國朝宮

詹高士奇

霓旌衛仙蹕月駟揚鸞音并參乍捫歷巖竇逾深
沈尋山異臺向載筆慚沈任綿綿騎出谷淄淄雲
栖林我

后展遐矚乘時此西臨飛輪越幽塊駐罕眺崎嶇春冰
雜古雪午風迴薄陰枝岐曲澗水木末寒號禽幸

五臺縣志

卷八

四

陪紫府遊側聽清笳吟披圖稽往轍覽物諧素心
皇情一以眷名區傳自今

其二

用謝靈運從斤竹澗越嶺溪行韻

象教從西來茲山名已顯佛樹根互盤天花露常
泫毒龍臥其湫紺塢浮於硯升高駭劣崩陟遐信
紆緬鐵鳳千尋翔金龍六時轉仰矚臺衣深近覺
髻螺淺霜鐘夜鏗鞞白雲晝舒卷髣髴赤華林對
談人在眼修蛇常山伏歸翼雁門展曠懷得所欣
遠目詎能辨宣遊自多豫頓使物慮遣

其三

用謝靈運從京
口北回應詔韻

山風吹不已山月忽已高飛鳴衆鳥散縹緲孤雲
超澄烟拂華旗吉日旋春鑣晨炊夾前騎舊路循
單椒靜聽谷口松宛似江門潮潺湲歷澗壑出沒
經亭臯七葉青娑羅一萼紅山桃泉因見龍發川
以射虎昭宿莽迷平岡選徒乃於苗回顧嶺上邨
林居等櫓巢諧此耕鑿民載路康衢謠

七言古詩

登清涼石

明太史
岳梁

五臺縣志

卷八

五

君不見清涼山前靈異石一片方方大如席云是
文殊舊道場千古流傳誇勝跡我生聞說自孩提
將信還疑難考索寄募茲山四十春苦爲浮名縛
冠幘邇來謫宦遊汾陽行旌北指臺山岡躋攀萬
仞不憚險清秋氣爽披清涼石旁拭目辨真僞恐
惑禪家虛誕累慙勲立石徧招呼僕夫累百堪容
萃始信空中色相真石能幻化通靈神石靈愈覺
文殊術術神常顯空中身空中身靈山塔我問靈
山山不答異石中藏元妙機識破元機輸老衲老

衲前知石性靈坐石談經神鬼聽經餘曉目諸山
淨神光繞石天花馨

天花歌

明
釋鎮澄

君不見五臺山產靈葩山人目之爲天花多在巔
崖深險處枯木雲蒸抽菌芽厥色渾如玉厥味薄
於瓜樵牧得之如獲璧持來獻入司公衙司公得
之亦甚喜歌筵舞席爭相誇烹羊宰鷲不足美必
得是物充珍佳在上欲得索其下公使展轉來山
家僧吏鳴鐘告其衆衆聞官令驚復嗟裹糧探求

五臺縣志

卷八

六

入深谷豈辭猛獸及毒蛇求之不得須貸易歸來
典却佛袈娑昔謂人間苦塵役偷閑學道歸烟霞
豈知寂寞寒巖下營營公事數如麻異物有時盡
人欲自無涯我願君子心如日絕疵瑕清光遍照
饑寒屋肯令一念恣驕賒

五言律詩

用峯山舊韻二首

姚孝錫

信步西風寺窮幽未覺賒松根纏石瘦雲磴出巖
斜思爽餘三唱詩成自一家空餘幾兩屐不踏渡

溪槎

春水上堤沙春晴散望賒衰年花近眼久客夢還
家映日孤鴻沒迎風雙燕斜平生江海意早晚送
浮槎

過五臺遇雨

明參政 魏倫

年年逢此日策馬問民俗乍見樹頭青翻疑麥浪
綠一犁春雨深四野報霑足遙憶山中人其人天
上玉

宿東臺

明司馬 趙夢麟

五臺縣志

卷八

七

瓊樓標象外日暮野雲孤北斗當窻列西天近座
隅羣峯歸冥冥大地入虛無此際吾高枕乾坤一
夢圖

獅子窩二首之一

每過僧誦處便覺一官輕幽壑從吾好浮雲任世
情凭欄看鳥跡依杖聽泉聲佳水佳山地終當結
素盟

梵仙山

踏雪尋山逕登臨四望紆陰森千樹合突兀一峯

孤野色時明滅鐘聲乍有無羣山不可見到此獨
躊躇

同塔院寺主人夜話

明進士 邢雲路
安肅人

海內誰知已天涯遇上人憐余僧有髮共爾幻成
身覺路諸天近曇雲半偈真無須婚娶畢便欲覓

山昀

望臺山

明邑令 高數仞

曾蒞五臺邑遙瞻紫府山踈鐘寒雨外野寺暮雲
間至聖誰能覩遊人空自還欲明前後偈須過上

五臺縣志

卷八

八

頭關

清涼石與王永泰對奕

孫傳庭

欲證三乘妙非爭一局強山中人自靜石上日偏
長子奪琉璃色枰分蒼蘆香豈同賭墅客定不礙
清涼

七言律詩

賦東臺

宋丞相 張商英

迢迢雲水陟峰巒漸覺天低宇宙寬東北分明觀
大海西南咫尺望長安圓光化現珠千顆聳日初

昇火一團風雨每從巖下起那羅洞裏有龍蟠

南臺

披雲躡雪上南臺北望清涼眼豁開一片烟霞籠
紫府萬年松徑鎖莓苔人遊靈境涉溪去我訪眞
容踏頂來前後三三知者少衲僧到此甚徘徊

西臺

寶臺高峻足穹蒼獅子遺踪入水傍五色雲中遊
上界九重天外看西方三時雨洒龍宮冷一夜風
飄丹桂香土石尙能消罪障何勞菩薩放神光

五臺縣志

卷八

九

北臺

北臺高峻碧崔嵬多少遊人到便回怕見目前生
地獄愁聞耳畔發風雷七星每夜霑峰頂六出長
年積澗盃若遇黑龍靈燥者人間心念自然灰

中臺

中臺岌岌最堪觀四面林峰擁翠巒萬壑松聲心
地響數條山色骨毛寒重重燕水東南潤漠漠黃
河西北寬總信文殊歸向者大家高步白雲端

總題

五頂嵯峨接太虛就中偏稱我師居
毒龍池畔雲生燥猛虎崑前客
過踈冰雪滿山銀點綴香花徧
地錦鋪舒展開生具長三尺方
占山河五百餘

過司竹監有懷王監正之

金戶部
尚書

楊 慥

不見松邱跨鶴仙才名留得萬人傳
春郊漬酒傷今日夜雨論文記昔年
塚樹謾懸公子劍高山已絕伯牙絃
故居修竹青青在寂寞終南落照邊

同東巖元先生論詩

邑人

王敏夫

林逋仙去幾年來年驚見梅花第二篇
千歲冰霜松

五臺縣志

卷八

十

骨瘦九秋風露鶴聲圓騰輝定出連城上
得趣知從太古前邂逅茅齋話終夕
只疑人世改桑田

九日題峯山

姚孝錫

不須歌吹上叢臺千里晴川入座來
世事難憑休掛口生涯現在且銜盃
無情趁暖花先老有信迎寒鴈已回
遙想故園親種菊霜枝露蕊向誰開

次韻王無競見寄

客懷重倚仲宣樓白草黃雲塞上秋
山色不隨塵世改水聲還抱故城流
隙中畏景那堪玩鏡裏衰

顏祇自羞多媿詩人苦相憶遠傳佳句弔清愁

望海峯

明吳處士
滕季達

翫海峯頭玉樹秋羽翰遙共白雲留金鋪宇宙三
千界翠擁蓬萊十二樓風露淒其生阮嘯星辰錯
落燦吳鈎雞鳴欲眺扶桑日鐘鼓宵殘尙拍浮

望海峯

邢雲路

清秋有客御風來直上梯空望海臺白社逢僧談
上乘青山無地著塵埃蜃蒸溟渤千靈見烏出扶
桑萬竈開欲覓慈航何處是歸依從此渡輪迴

五臺縣志

卷八

十一

南臺錦繡峯

明藩宗室
友松道人

天風吹上妙高臺滿眼山光紫氣開鐘破晚烟清
落澗履拖春雨亂粘苔水邊呪鉢龍飛出松底翻
經鶴下來一坐清涼絕塵事浩歌歸去幾徘徊

西臺掛月峯

西峯寒色暮蒼蒼夢入烟霞古澗旁紫府芙蓉山
隱隱清涼坐愛石方方雲中採得薇偏美花裏流
來水自香何處鐘聲幽夢破一窻蘿月淡秋光

南臺和韻

明錢塘涵素居士
胡鎮

淡煙縹緲隔仙臺
混沌鍾靈始鑿開
霜葉半林紅
露寺雨碑一片綠
封苔晴空花雨有時下
樹杪金燈幾度來
感應曾聞張相國
令人追憶幾徘徊

北臺叶斗峯

明釋
覺同

北來乘興上崔嵬
天外捫蘿鳥徑迴
寒谷未秋先落葉
陰崖不雨自生雷
低懸銀漢星千點
俯視滄溟水一盃
笑指文殊棲跡處
幾經劫火不曾灰

中臺擁翠峯

明
史監
姑蘇人

上方樓閣聳奇觀
金磬泠泠度翠巒
深樹浮嵐晴帶雨
陰崖積雪夏生寒
鰲行鼻屨星辰近
雲起氤氳宇宙寬
何處紫簫吹落月
不勝清思繞臺端

中臺

滕季達

壁立中臺萬丈峯
半空空翠落芙蓉
千年古塔函金象
滿谷寒冰臥玉龍
晴壑例懸南澗瀑
春雷隱約下方鐘
青鞋久混緇黃跡
瑤艸天花處處逢

五臺詠

史監

懸崖削壁勢凌虛
中有金仙遁跡居
天近星河常掩映
雲深草木自扶踈
六時花雨含香落
五夜神

光帶月舒絕頂登臨飛鳥外一聲長嘯海天餘

過五臺山

明參政江藻蜀人

五臺山上霧烟浮霧散臺分山自幽前朝寶刹排
雲外盛代珠幡繞殿頭風雷激烈龍池夜草木淒
涼鴈塞秋百仞危崖盤屈曲古今來往幾時休

同劉兵憲督木至河口賦山川之盛

明三邊總制曾銑

青巒翠壁幾週遭虎踞龍騰氣勢豪萬木蕭森掩
日月一泓清澈照戈旄乾坤雄傑應千古人世驅

五臺縣志

卷八

十三

馳愧二毛仰視飛鴻霄漢際翛然清興欲翱翔

遊五臺絕頂

趙夢麟

清秋乘興御風來五頂登臨亦壯哉萬木陰森香
霧合千峯靉靄瑞烟開西飛日月階前沒東去江
河檻外迴安得凌虛生羽翼憑高咫尺到蓬萊

南峪雨後取道上五臺

明學憲陸深

六月蕭然似晚秋登高重整木棉裘卽看滿澗泉
初出知是前巖雨乍收碧嶂旋隨孤鳥沒白雲長
傍古松留幽芳一路無人采何處三山更十洲

入臺

山水情多不自由白頭終作五臺遊萬重雲樹高
低出千里滹沱背面流絕頂直疑天北極朝陽初
見海東頭共傳此是清涼地爲洗煩心盡日留

遊五臺

五雲常覆五臺端天近清都特地寒澗道千年冰
未化林梢一夜雨初乾黃河紫塞依依見碧殿朱
樓面面看萬壑千巖青未了更從高處望長安

宿顯通寺

一榻空齋臥白雲青燈微雨夜初分無緣十日慚
凡骨有夢三臺繞聖君別院鷄催山月吐迴廊魚
咽澗風聞青山亦是人間世自覺悠然隔世紛

竹林寺避雨

十里肩輿石磴深禪房瀟洒亂峯陰巖花笑裏饒
月色山鳥倦餘懷好音下界風雷喧衆壑上方鐘
鼓出長林蒼山正有爲霖望暫憩西來冒雨心

竹林寺擬宿

未有長歌行路難青山最愛雨中看圖書暫許淹

塵榻蔬蕨先教具
午飡碧樹洗空澗
出白雲封滿萬松
寒天留再宿
清涼地明日溪南
十八盤

清涼石

炙手薰心事已多
曉涼來撫石盤陀
不爭可受人坐無
事應須百遍過
初日射林光歷亂
懶雲將雨濕嵯峨
夜深或有騎牛到
堪和南山扣角歌

別山二首之一

孫傳庭

看山殊慰十年盟
隱計猶憐尙未成
到日雲霞如有意
歸時猿鶴豈無情
丹崖翠壁皆留詠
瑤草琪

五臺縣志

卷八

十五

花半識名此去清涼應笑我
勞勞城市欲何營

五言絕句

金閣嶺

魏 綸

山行情不極復聽遠流聲
夜來擁衾坐僧窓月自

明

天城寺

孤磬發清響松聲起亂濤
夢醒聞梵語愧爾絕塵

臺

華嚴寺

鶴影穿谷落笙聲隔水聽頓忘塵俗想直欲識無
形

天池寺

一脈通幽窈中涵萬象清細流山下去莫教野塵
縈

咏滹沱河

明邑教諭

王大輅

既識浮官筏宜憐近瀨田入山還自戢過曠却騰
騫

閣嶺

五臺縣志

卷八

十六

一閣當蒼峽連峯鎖白雲東南憑此寄霜雪望彌
殷

五臺學署月夜

暑氣侵輕葛山城吐月花白雲飛處斷何在是吾
家

山中雜吟

孫傳庭

盛夏全無暑風來任地寒離塵纔幾許天上作何
觀

人跡眞難到奇花 在生原皆天女散安得盡知

名

引水遙通竈裁山曲抱墻高樓窺樹遠虛牖納雲
長

天畔數聲鐘聽之清思發獨起步空階但見空山
月

細路何盤折重經碧蘚封鐘鳴知寺近只隔數重
松

樹起不見山雲生不見樹往來翠微中衣溼非關
雨

五臺縣志

卷八

十七

空林寂無人清言共誰訂流水澗中鳴泠然動我
聽

一片清涼石憑余任意眠歸來倘有意不用買山
錢

七言絕句

乾陵

楊 慥

牝鷄一啄血波流天下何緣不姓周今日阿婆心
力盡乾陵禿似老僧頭

同新進士呂子成輩晏集狀元樓 張大節

鸚鵡新班宴杏園不妨老鶴也乘軒龍津橋上黃
金榜三見門生是狀元

李氏友雲樓

王敏夫

霧靄烟迷十二欄壺觴招我一躋攀黃簾卷起湘
川竹分得西州數點山

題柳溪別墅

雨霽風和不動塵柳邊携酒賞晴春頻來溪鳥渾
相識渡水穿花不避人

臺山雜詠十六首

甲寅六月

元好問

秀容人

五臺縣志

卷八

十八

西北天低五頂高茫茫松海露靈鼇太行直上猶
千里井底殘山枉叫號

山上離宮魏故基黃金佛閣到今疑異時人讀清
涼傳應記諸孫賦黍離

一國春風帝子家綠雲晴雪間紅霞香綿穩藉僧
鞦韆草蜀錦驚看佛鉢花

沈沈龍穴貯雲烟百草千花雨露偏佛土休將人
境北誰家隨步得金蓮

靈蛇不與世相關時復蜿蜒水石間何處天瓢待

霖雨一龕香火梵仙山

登臨夙有故鄉緣試手清涼第一篇知被錢郎笑
寒乞不將錦繡裹山川

萬壑千巖位置雄偶從天巧見神功湍水已作風
雷惡更在雲山氣象中

顛風作力掃陰霾白日青天四望開好箇臺山眞
面目爭教坡老不曾來

山欲吞吐翠微中淡綠深青一萬重此景祇應天
上有豈知身在妙高峯

五臺縣志

卷八

十九

兜羅綿界寶光雲雲際同瞻化現身解脫文殊俱
有說是中知有木強人

眞向華嚴見化城翻嫌金屑翳雙明惡惡不可惡
惡可未要雲門望太平

總爲毗耶口不開龍宮華藏頓塵埃對談石上維
摩在珍重文殊更一來

咄嗟檀施滿金田遠客遊臺動數千大地嗷嗷困
炎暑山中多少地行仙

石罅飛泉冰齒牙一盃龍焙雪生花車塵馬足長

橋水汲得中冷未要誇

凜凜長松臥澗阿提壺悲嘯撫寒柯萬牛不到秋
邱重細路沿雲奈爾何

熱惱綃除佛作緣山頭冰雪過尖天法王悲智何
窮盡更有清涼遍大千

眞容院

蕭貢
咸陽人

魔宮佛界等空虛此理何曾屬有無直向臺山始
相見可中還有二文殊

登環城山

明布政
陳懋章

五臺縣志

卷八

二十

削壁俯聯千嶺秀曲泉旁引一泓幽已將勝概耽
俗絆更擬何年續舊遊

題清涼石

明副使
楊彩

禪林此石自何來勝跡乾坤壯上臺獨伴白雲迷
歲月寒風暑雨任相催

題顯通寺

明侍郎
閔煦

馬頭山色向人來林裏泉聲帶雨迴秋與不隨孤
鷺去傍君相看百花開

中峯寺

埜寺山深月出遲飛泉灑雨任風催攬衣折竹掃
苔色拭目尋簷認古碑

竹林寺憶月川上人

孫傳庭

高衲僧聞隱竹林應憐空翠似禪心一從寂後荒
涼甚明月川前自古今

